

Comun General de Fascia

Boletin 2023 n. 2-Suplement a La Usc di Ladins nr 49, dai 15 de dezember del 2023

Comun General de Fascia—Str. di Pré de gejia 2—38036 Sèn Jan/S. Giovanni di Fassa
tel. 0462.764500 · fax 0462.763046 · www.comungeneraldefascia.tn.it
Coordenament: Lucia Gross, Layout: Veronika Insam

IR



Servijes e Ofizies

Canzelaria e secretariat

Telefon segreteria: 0462 764500 int. 1

Fax per duc i ofizies: 0462 763046

e-mail: segreteria@cfgf.tn.it

Pec per duc i ofizies: pec.cfg@pec.comungeneraldefascia.tn.it

Contabilità, Finanza e Personal

tel int.: 6 Ragioneria; int. 7 Personal

e-mail: ragioneria@cfgf.tn.it;

personale@cfgf.tn.it

Afares Generèi, Servijes informatics e informatives e Assistenza Scolastica

Tel.: 0462 764500 int. 2

e-mail: affari.generali@cfgf.tn.it

Igiene urbana e ambientèla

Tel.: 0462 764500 int. 5

e-mail: ambiente@cfgf.tn.it

Servijes linguistics e culturèi

Tel.: 0462 764500 int. 4

e-mail: cultura@cfgf.tn.it

Servijes sozio-assistenzièi

Tel.: 0462 764297

e-mail: sociale@cfgf.tn.it

Servijes tecnics frabica e urbanistica

Tel.: 0462 764500 int. 3

e-mail: tecnico@cfgf.tn.it

Portel informatif PAT

Tel.: 0462 763505

e-mail: mariano.rasom@provincia.tn.it

L Consei de procura

Giuseppe Detomas—Procurador:

afares generèi e istituzionèi; personal;

e-mail: procurador@cfgf.tn.it

Riccardo Donei

Bilanz; gestions sozièdes; turism; comerz

riccardo.donei@cfgf.tn.it

Giorgio Dorich

Traspòrc; troes; coord. politiches sport

giorgio.dorich@cfgf.tn.it

Mirella Florian

Sozièl; derit al studie; volontariat; 1^ cèsè

mirella.florian@cfgf.tn.it

Carlo Ganz

urbanistica; lurieres publics; patrimonie;

carlo.ganz@cfgf.tn.it

Martina Pederiva

Ambient; ecologia; gestion refudam

martina.pederiva@cfgf.tn.it

Amedeo Valentini

Inovazion; cultura; polit. lengaz e joegn

amedeo.valentini@cfgf.tn.it

N empegn a 360° degrees per la comunanza de val

Lé stat lurà per comedèr situazions senestres che jia inant da egn, per ge arsegurèr l giust recognosciment al ent soracomunal de val e per meter a jir e portèr inant sevijes per noscia jent



Da man cencia: l Procurador Detomas, l Vizeprocurador Micheluzzi e i Conseires: Dorich, Donei, Valentini, Pederiva, Ganz e Florian.

L Comun General sera su chest 2023 con n bilanz che pel esser considrà positif per la neva scomenzadives e i projec, tel ciamp sozièl, tel chèder de la promozion culturèla e de la valorisazion de sié patrimonie imobilièr.

Zacan l é stat metù a post la proprietà del Navalge

Partisse avisa da chest ultim aspet, per recordèr con sodesfazion la soluzion de la longia costion de la titolarità del Teater Navalge, che l'à dat l met, do passa 20 egn, de l registrèr a na vida definitiva tel cataster e de meter a partida sia proprietà al Comun de Moena. Somea biot na costion burocratica, e defat la é pa ben. Ma la amministratzions di ultimes 15 egn aea pròà endester a regolarisèr l fabricat, e demò l intervent de na norma de lege spezifica, lurèda fora e portèda dant dal Comun General, l à permetù de deschiarir chesta costion. Paa la speisa recordèr che la doura de la strutura per duc chisc egn la era leèda a permissons provisores e la malseureza sun sia proprietà no lascèa niente jir inant coi lurieres de manutenzion che ge volea fér.

Donca, na strutura zis emportanta per la val e desvalua da duta l'altres per sia carateristiche la pel zacan esser metuda a la leta de la comunanza e vegnir durèda coche carenea.

L restaure di frabicac del Comun General a Sèn Jan

Co la medema sodesfazion podon ge vardèr a la fin di lurieres de la "Ciasa de la Moniaria" a Sèn Jan, n fabricat che l è n testamonech de gran importanza de nosc passà e n segn de la collaborazion veiora anter la istituzions ziviles de noscia val e la Gejia de Fascia. N fabricat che per sie logament e sia storia no se podea fér condemanco de l durèr desche senta di Servijes linguistics e culturèi de nosc Ent e de l'Union di Ladins de Fascia, sociazion che l'à lurà acioche l vegnisse comprà e restaurà. Tinultima, de gra a la collaborazion del Consorzie di Comuns Trentins e de la Provinzia l é stat envià via l percors de projetazion del fabricat de l'ex Caserma Vittorio Veneto che sarà la neva senta del Comun General; la senta de ades la vegnarà durèda duta per i Servijes sozio-assistenzièi.

L'atività de promozion de lengaz e cultura ladina

Sessaben l é jit inant ence l lurier de nosc Servije per la promozion e la valorisazion del lengaz e de la cultura ladina, con n gran smaoramant de la atividades de traduzion

a favor de la amministratzions pubbliches e de endrez de evenc e scomenzadives: per n recordèr una, "L'Aisciuda Ladina", che desche vigni an l'à abù n gran suzes de partezipazion e enteres. Té chest ciamp fondamentèl de attività del Comun General, paa la speisa recordèr l'urier fat da la Consulta ladina, organ de chel che fèsc pèrt la Scola ladina de Fascia, l'Istitut Cultural Ladin, l'Union di Ladins, l'APT e la sociazions culturèles de Val. La Consulta laora fora l Pian organich de politica culturèla linguistica e la dèsc fora i finanziamenc del Comun General ai sogec che se cruzia de promozion de nosc patrimonie linguistich e culturèl con manifestazions e scomenzadives editorièles, de teater e formazion.

Neves per l ambient, la desgorta e la mobilità

Acajon de la dificoltèdes e di cosé per desgorjer l refudam, che vegn ca da la saturazion de la descerìes e da la mencianza de na brujadoa e de n termovalorisor, la Provinzia l'à dezedù de envièr via n prozes de reforma del sistem che ti egn che vegn l tolàrà ite ence noscia organisazion. Estra che zentrèr l servije sot n nef soget a livel provinzièl, l é pervedù de envièr via na fasa de studie e projetazion de n impiant che dae l met de serèr l zicle del refudam. L Comun General, dessema con de autra comunitàdes, l à tout pèrt a na vida ativa a la discusione per troèr fora zacan la soluzion de chest gran problem. La funzion de coordenament e de colaborazion coi Comuns l'à abù na gran emportanza te l'atività de nosc Ent. Autant emportantes l é ence la formes de cooperazion con noscia APT. En cont de chest me sà bel recordèr, anter l'altres, la funzioni del Comun General desche ent a cef del servije Skibus, del projet de manutenzion e netijia de la rei di troes da mont e desche coordinador di enc locai te la fasa de partezipazion del projet Bus Rapid Transit.

Li sozièl: n setor che domana semper maor atenzion

Ampò se l é vera che l degré de zivilità de na comunanza se l mesura da l'atenzion che l ge dèsc a la personnes più deboles, se enten delvers tant emportant che l é l urier del Comun General da chest pont de veduda. Nosc Servije, che se cruzia de l'assistenza sozièla e de l'integrazion, l fèsc vigni dì sul teritorie n urier fondamentèl de didament, sostegn e assistenza a nesc conzitadins che i é te situazions de dificoltà e dejèje. Té chest ciamp la scomenzadives metudes a jir les é dalbon n muie, ence col zil de ruèr apede a situazions de besegn e dificoltà che, te na sozièt che muda do e do, revèrda semper piuttost.

Donca n urier semper più zentrèl del Comun General te la atividades de servije a noscia comunanza.


L argoment mingol più doous l é la costion del trasferiment da pèrt de la Provinzia di finanziamenc che serf per poder meter en doura concretamente l'altra funzioni che la lege ge dèsc su al Comun General. Da chest se enten che la Provinzia stenta a ge recognoscer a nosc ent la lèrga che ge vegn dat su dal Statut de autonomia. E chest tant sozeti enceben che se seghite a solezitèr e enceben che l'Avocatura de Stat l'abie dat ju sie parer en cont de chest. Noscia rivendicazions no les é demò finanzieras, ma les é outes a uzer fora l'autonomia de nosc ent en funzion de la valorisazion de noscia spesificità.

Te chesta azion de solezitazion e de sensibilisazion ti confronc de la Provinzia sion segures de poder se lascèr sul sostegn del Conseiller provinzièl Luca Guglielmi, che da pech l é stat confermà te chesta posizion, e a el ge sporjon nosc augure de cher de bon urier per l ben de noscia Comunanza.

Giuseppe Detomas
Procurador del Comun General de Fascia

I miories augures de Bon Nadèl
che sie n temp de biota felicità
e che l Bambin porte sanità,
serenità e legreza e pèsc te dut l mond.
Per l'An Nef
i augures de aer semper vejin amisc sinzieres,
braciaco per i despiajeres,
grignoc per vigni lègrema e ensomesc
per vigni delusion.

L Procurador e l Consei de Procura
del Comun General de Fascia



Nan de lurier per noscia comunanza

**Cariscimi fascegn
e cariscime fasciane,**

i miores augures de Bone Feste e amò de più i miores augures de n Felize An 2024 rich de sodesfazion.

Sion vejin al Nadal, che cognessa esser per duc n temp de biota felicità, sention l besegn de esser contenc de aer vejin le persone più emportante per noi e l besegn de jir a renovar nosce bele tradizion.

L é ence l temp de far consuntives: varde en do e peisse a chel che l é stat fat te chisc ultimes sie meisc da man di servijes del Comun General de Fascia che é l onor de raprejentiar desche Conseiera de procura

con delega al sozial e al derit al studie. Varde ence a chel se aessa podù far e a chel che per n muie de costion no se é stac bogn de far.

N detelpai a duc chi che à lurà con empegn. Descheche podede lejer sun chest boletin l é stat fat n muie de projec per l ben de la jent de Fascia che n muie de oute no i é cognosciu assà.

Resultac de valuta i é stac arjont per noscia jent ence da man del Servije sozio-assistenzial, e chest de gra a la profesionalità e a la passion che le assistente soziale, le assistente te le majon e le aministrative met vigni dì te sie lurier. N gran detelpai donca

a dute per aer dat n contribut prezios acioche i servijes sporc dal Comun General de Fascia i podesse esser semper più aprijié da la jent de Fascia.

No se pel desmentiar che, apede ai projec, dut l personal del Servije sozial e ence chel che laora te duc i ofizes del Comun General de Fascia l é empegnà a portar inant i lurieres pervedui istituzionalmenter. Donca amò n gran detelpai a duc chi che laora te chesta noscia istituzion per sporjer servijes per noscia comunanza.

Mirella Florian
Conseiera de procura al sozial e derit al studie



Coi 25 de october 24 picioi fascegn à podù vegnir touc ite te la neva coa di picioi.

La coa di picioi de Soraga

Scomenze da la coa di picioi ja Soraga, n servije che l é pontà via ai 25 de october con 24 picioi con na età che va da 7 meisc fin a 29 meisc. L é stat fat trei gropes coscita spartii: 5 picioi anter i 7 e i 13 meisc; 5 picioi anter i 8 e i 16 meisc e 14 picioi da 22 a 29 meisc.

L é stat fat n gran lurier da man de Devi Brunel del ofize Afares istituzional che rengrazie de cher per sie competenze, sia profesionalità e per la sensibilità che aon sparti tel meter a jir n servije che no l é mai stat te noscia Val.

N gran detelpai al Comun de Soraga e en particolar a Sandra Bussolon, a la Coprativa Coccinella che à venciu l apalt, a dute le educadore, a scomenzar da Elisa Bonapace e Lorenza Soldà, le doi coordenadore, e al personal ausiliarie. Son segura che l amor



La senta de la Coa di picioi e de la scolina a Soraga.

che duc metarà te sie lurier l podarà esser spartì con chisc picioi che l é nosc davegnir. Voi rengraziar ence i desvalives sponsor che

à contribuì a far più bel chest lech. L dì de l'inaudazion aron l piajer de i rengraziar publicamente.

“Spazio Argento” e l problem del smendrament cognitif

L Servije sozio-assistenzial del Comun General de Fascia porta inant sie lurier te la competenze pervedutes da la Lege provinzièla dai 13 de messèl 2007 nr 13: “Politiche sociali in provincia di Trento”. Tel cors del 2023 l organich é stat smaorà, l é stat tout su na assistenta soziala e na assistenta aministrativa, e coscita l é stat possibol tor su neva competenze che ge é states dates su, desche l model organisatif “Spazio Argento” pervedì da la lege provinzièla dai 16 de november 2017 nr 14 che se ouc a la personnes che à compì 65 egn, e l potenziament del program PIPPI a sostegn di bec e de families che vif na situazion delicata.

Descheche l é stat dit, del 2023 per la jent de età l é peà via “Spazio Argento” che se met dant soraldut trei obiettives: smaorèr e miorèr la ressors e i servijes, troèr neva respottes per responder ai besegnes che vegin fora e vardèr de entener per temp i problemes de la personnes. Per responder a chest mandat l é stat troà fora n post ti ofizes a pian teren te Comun General desche senta de “Spazio Argento” e l é stat metù ensema na équipe che posse lurèr adum te na integratzion sozio-sanitaria, e che tol ite apede a doi assistentes sozièles e na assistenta aministrativa ence na infermiera del Distret ladin de Fascia e na referenta de la Cësa de Paussa de Fascia.

Chest nef sistem l é stat pissà, apede che per responder ai besegnes spesifics de la personnes de età, per doventèr n contegnidor de duta la scomenzadives de promozion e atenzion ai aspec de prevenzion, cura e assistenza ence travers scomenzadives che tol ite duta la comunanza. En particolèr de setember l é stat aproà dal Servije politiches sanitères per la personnes che no pel per se (PAT) l Pian Trienal per l svilup de na comunanza amica de la personnes con demenza, n projet che à l Comun General de Fascia desche capofila e che tol ite desvaliva istituzions,



Anter i projec porté inant da „Spazio Argento” con de autra istituzions l é l „Centro di Incontro” per la prevenzion del smendrament cognitif.

sociazions e realtèdes del teritorie desche Rencureme, la Coprativa Le Rais, l'Azienda Sanitèra (APSS), la Cësa de Paussa (APSP) e l Comun de Sén Jan. L obietif l é smaorèr la consaputa e la comprenzion del problem de la demenza, a na vida che duta la comunanza se tole a cher la situazions senestres che vif la personnes con chisc problemes e pissèr ence a chel che se pel fér per prevegnir l più possibol l smendrament cognitif.

En riferiment a chest ultim pont, l é da recordèr che va inant l “Centro di Incontro”, n projet experimental envià via já da vèlch an e che ades l é doventà n referiment important per la personnes che scomenza a

aer problemes de cef. Chesta scomenzadiva, rencurèda dal Comun General de Fascia en colaborazion con Rencureme e Le Rais, la vegn svilupèda con na scontrèda na outa en setemèna olache ai partezipanc ge vegn proponet n moment de sozialisazion e de ativazion personèla travers desvalives strumenc de stimolazion del cervel, desche la musega, l'atività fisica, la conties e c.i. L grop se bina de mercol da doman te oratorie de Poza alò dal Zircol de la Jent de età, che rengrazion per ne aer metù a la leta sia senta e l servije de trasport, che da pech l é stat tout su da la Crousc Chescena, con si volontères che pel durèr n meso comprà col

contribut provinzièl.

No podon se desmentièr de duc i etres intervenc per la jent de età che vegn fat per favorir che i veies posse stèr te cësa, per la promozion e per l'inclusion soziala a favor de la jent de età e de chi che ge stèsc do, desche l projet “CuraInsieme”, l Pont informatif per l Aministrador de Sostegn e l portel de neuropsicologia proponet da la sociazion Rencureme.

I sentadins enteressé a aer informazions sui servijes de “Spazio Argento” i pel se oujer al Servije sozio-assistenzial (0462 764297) dal lunesc al vender da les 10.00 a les 12.00.

Anteveder: per na comunanza inclusiva e contra la dependenze



Te la senta del Comun General de Fascia l professor Carlo Andorlini à rejonà de l'importanza de la relazions per fèr crescer na comunanza.

Tel meis de mé del 2023 l é ruà a compiment 1 percors partizipatif "Anteveder", che ne à dat l met de meter al luster i besegnes de noscia realtà. Chisc besegnes é stac scric tel Pian Sozial del Comun General de Fascia, l document che vidarà l lurier del Servije sozio-assistenzial fin al 2025.

Aldò de chest Pian l Servije sozial se à dat jù per meter a jir scomenzadives che podesse troèr la pruma responetes.

Anter i besegnes l é vegnù fora l problem del consum de alcol e de droghe, e sun chest te chisc meisc à lurà l "Desch per la dipendenze". L é stat fat doi scontrèdes su la promozion del benstèr e de la sanità con n aprofondiment su la costion alcol dessema al Servije de alcologia; aon scontrà i gestores di locai per spartir con ic na campagna de sensibilizazion e l é stat metù al luster desvalises problemes leé al consum de alcol e de autra droghe te anter i joegn ma ence te anter i manco joegn. En cont de chest ai 27 de october l Servije sozial à metù a jir trei spetacoi de teater dal titol "Stupefatto – Avevo 14 anni, la droga molti più di me" (2 sporc ai studenc di licei de la Scola Ladina de Fascia e un per duta la comunanza) sul tem de la maldoranza de sostanzas, con n moment de aprofondiment e reflescion.

L obietif del Servije sozial l era fèr na sensibilizazion a na vida che bec e genitores rue a se rejonèr entornvia chisc problemes. Demò se ruon a soscedèr n dialogh te cèsà, anter genitores e fies, se podarà ge fèr front a chest grief problem che, per disgrazia, l é ence te noscia sozietà.

■ La setemèna del azet

Ence chest an aon tout pèrt dai 30 de setember ai 7 de october con desvaliva scomenzadives a la "Setemèna del azet" che chest an aea desche titol "Cercando casa – abitare la comunità".

Té chesta setemèna l é stat rejonà de prospectives col referat "Vardon al davegnir te Fascia" de Francesco Brunori". L é stat metù dant l tem del ambient, cèsà de duc, col intervent de la prof.a Elisabetta Demattio

"La casa di tutti noi – ci vogliono inquilini rispettosi, attenti e parsimoniosi". Amò Carlo Andorlini, espert de inovazion sozio-culturala e svelup del welfare territorial, ne à rejonà de "La prossimità relazionale come strumento per crescere". L ultim apuntament de la setemèna l é stat na meisa torona dal titol "A risedh cultura, lengaz, identità e neva families" olache à tout pèrt l Procurador Beppe Detomas, l Conseier de Procura Carlo Ganz, l Diretor de "La Usc di Ladins" Iaco Rigo e l Secretèr de la Regoles de Ampez



Te a setemèna del azet l é stat rejonà del problem de troèr cartier per jent del post e per chi che rua a lurèr te la valèdes ladines.

Stefano Lorenzi, che con la moderazion de Riccardo Zanoner di Servijes Linguistics del Comun General i à metù al luster l problem de troèr cèsà te la desvaliva realtàdes ladines. Donca scomenzadives de gran valuta, che no à demò rejonà de la cèsà, ma ence de coche na comunanza pel crescer e del ambient desche cèsà de duc che duc adum cognon rencionerè e stravardèr.

■ L projet TRAME

Te la setemèna del azet l é stat ence prejentà l projet TRAME, "Turismo inclusivo Responsabile e servizi di comunità Accessibili attraverso un Modello di Empowerment sociale" peà via acà vèlch meis a Cianacei lo dal Garnì Villa Mozart. L Servije sozio-assistenzial l é partner de chest projet, che vel meter dant n nef model de azet, con servijes spezifics ence per pedimenté. L é n projet finanzià da la Fondazion Caritro, da la P.A.T., da la Fondazione Franco Demarchi e dal C.A.L..

Te la strutura de Cianacei l é stat metù a la leta spazies de sozialisazion, laboratories del fèr, scomenzadives educatives e culturèles. La Coprativa Oltre l é 1 soget capofila, dessema al Comun General, Trentino Social Tank (TST), Comun de Cianacei, Coprativa Inout, Sociazion Bambi e l'APT de Fascia. Apontin chisc dis, dai 14 ai 16 de dezember, l é stat metù en program 3 scontrèdes: una de "Spazio Argento" con la jent de età; una de la Coprativa "Il Pettiroso" con mères che speta o che les abù n piciol da pech e una de Bambi con bec de la scoles populères.



Spetacol de teater „Stupefatto“ à envià genitores e fies a rejonèr de dependenze te cèsà.



La prejentazion del projet TRAME a Cianacei à avert la scontrèdes de la setemèna del azet.

Etres projec e scomenzadives



En ocasion de la dì del volontariat rapresentanc e componenc de la sociazions de Fascia é stac envié dal CGF a na scontrèda per i rengrazièr e rejonèr de la endesfides per l davegnir.



Te Oratorie de Moena l é stat endrezà la "Ciasi de l'Armonia", na gran cambra multisensorièla interativa per l benstèr de personnes con problemes desvalives.

Chisc meisc passé l é stat endrezà la "Ciasi de l'Armonia" na cambra multisensorièla interativa che à de gran potenzialitàdes per l benstèr de personnes con problemes desvalives e jent de età, ma la pel esser de utol ence per la didatica. L é na strutura endrezèda da l'Anffas col contribut de la Fondazion Caritro e n é demò 3 o 4 te dut l Trentin; de gra al enteressament del Comun General de Fascia una de chestes à podù vegnir enjignèda te la ciasi de la comunanza parochiala de Moena. Chest projet é stat sostegnù da desvaliva sociazions, desche Bambi, Rencureme e l Laboratorie Sozièl, col didament tecniche de Elena Zanon per emparèr a desfrutèr al miec duta la potenzialitàdes.

Apede a la implementazion del program

PIUPI, l Consei General à aproà vèlch convenzion perveduda dal PNRR che revèrda l potenziament di Servijes soziali, desche la la prevenzion del burnout, na condizion de esauriment leèda al stress per chi che laora tel sozial; n projet de cohousing co la senta te la val de Cembra: se trata de n model de cèsa che met ensema l'autonomia de la persona scherpenta col spartir con etres spazies e servijes; n projet per nesc veies, soraldut persone clemenzinoles, che perveit n smaorament de la ores de assistenza a cèsa a na vida che se posse miorèr l lurier che i operatores fèsc canche la personnes vegn fora dal ospedèl. A chesta vida, tel medemo temp, vegn ence scurtà i tempes che chesta personnes cognessa stér te ospedèl, donca l é n projet che tira ite ence l'Azienda Sanitara.

N'autra scomenzadiva metuda a jir con apuntamenc fora per l an l é l projet "alimentare cultura", per sostegnir na vida più sana e vejina al ambient ence l'alimentazion.

Anter i ultimes projec l é da recordèr i doi momenc metui a jir en ocasion de la dì contra la violenza su la eles, col spetacol "Copèdes te l'ènema" metù a jir tel chino Marmolèda de Cianacei e al PalaDolomites de Ciampestrin con la regia de Michela Marangoni, e la scontrèda per la dì del volontariat te oratorie de Poza per rejonèr de "Crescere e condividere: nuovi modi per fare volontariato" con Carlo Andorlini e con Giovanna Galeaz e Giulia De Paoli del CSV Trentino – Non Profit Network.



L spetacol contra la violenza su la femenes: ot testimonianzes, la cianties de Damiana Dellantonio e la regia de Michela Marangoni.

Ve augure Bone Feste, e stajene vejins!

Al scomenz aee scrit ence de chel che se aessa podù far o de chel che per n muie de costion no se é stac bogn de far. Ben segur aon tal cias n muie de robe da far e le vegnarà fate tel davegnir. Una de cheste l é la scontrada su l'endometriosi col primarie de ginecologia dotor Gian Luca Marcomin, che la é stata spostada più inant per empegnes del relator. Per l projet "Niente limiti solo orizzonti" se pervedea de jir inant con na sensibilisazion te

anter le aministratzion col jir a veder olache, sul tegnir di Comuns, se pel tor demez le bariere architetoniche e troar soluzion peracante aldò. Chest se podarà l tor en considrazion chest'aisciuda. No se l desmention de segur, e endana invie la jent de Fascia a scutar la cianzon scrita per chet projet da Rosanna Verra, metuda en musega da Marco Mattia e ciantada da "Cianton da marevea": podede la troar en streaming a chest link: <https://www.youtube.com/watch?v=8mytPZxu8VQ>

de gra a n contribut del Servijes sozial del Comun General de Fascia.
Voi renovar amò i miores augures de Bon Nadal e de Bon An a duta la jent che vif te Fascia col invit a vegnir a cognoscer miec l Comun General de Fascia, na istituzion unica de chesta sort perveduda dal art. 8 de la Lege Costituzionala nr 1 dal 1 de dezember 2017, che la é amò pech aprijiada e pech cognosciuda dai fascegn.

Crese che cognoscer duc i servijes che l Comun General de Fascia met a jir podessa servir a ge far front a n muie de situazion senestre che vif noscia jent.
Del 2024 e tel davegnir stajege vejins a vosce istituzion!
Bona Festes!

Mirella Florian
Conseiera de procura al sozial

La Comision Economia laora su l'abitajon

Via per chisc meisc passé sion jic inant a lurèr ence tel setor del turism e del comerz. Ai prumes de november l é stat chiamà ite la Comision Economia per la ratifica de la nomina del Procurador Detomas che l é jit ite a mie post ajache gé aee fat n vèreh en do per rejons personèles e te chesta ocasion l é stat ence lità l nef president te la persona de Luciano Fosco. Te la Comision Economia l é ite cater raprejentanc del grop de maoranza (Giuseppe Detomas, Luciano Fosco, Giuseppe Gilli e Andrea Zanoner) doi del grop de mendranza (Armando Mich e Marco Pederiva) e un del grop mescedà (Matteo Zanon). Gé, ajache tel Consei de procura é la delega a la atividèdes economiches, saré semper en contat con la Comision e vegnaré semper metù en consaputa de la dezijons che vegr tout. Te chesta scontrèda l é stat rejonà su la

enrescida che à fat i Comuns de Fascia su la lizenzes alberghieres che te chisc egn l é jit fora de man, che les è states zedudes o fitèdes. Chest l é n tem de gran enteres e atualità olache ence l Comun General de Fascia pel fèr sia pèrt. Da noscia scontrèda l é vegnù fora che chel del passaje generazional l é n argoment delicat e segur l é la cauja, en dut o en pèrt, del trasferiment o de la perduda del patrimonie alberghier. Sun chest l publich no pel fèr trop, l pel aboncont stimolèr la formazion e la creazion de na cultura specifika. Lan passà l'ApT de Fascia à endrezà n cors de formazion proprio sun chisc argomenc e donca podon dir che la istituzions les é do che les se mef. Na soluzion per tegnir proprietà e gestion de chisc hotie te "noscia mans" pel esser chela de la sozietèdes de gestion. Te chest cajo se trata de scomenzadives che vegr metudes

a jir da na rei de imprenditores/hotelieres, sozietèdes che apede a gestir les podessa ence jir a comprèr l hotel descheche l é già sozedù con na scomenzadiva tel Zenter Fascia ti egn passé e che la é do a aer n gran suzes. Te chesta direzion vèlch se mef ence te la Val de Sora. Olache enveze pisson che l publich posse entervegnir l é vardèr se sun chisc hotie desmetui o seré se pel fèr mudamenc de destinazion, chiò ge vel veder se se pel lurèr sui Pians Regolatores e sui strumenc che à i Comuns per stabler la destinazion de n frabicit. Chesta strutures les podessa vegnir metudes a la leta per cambres per lurieranc o se podessa ence les restruturèr te picoi condominies o pruma cèses. Aon vedù che semper de più te Fascia l é senester troèr cèsa e chest porta a doi conseguenze: l personal che vegnissa a lurèr chiò da nos no l vegr percheche no l

troa cartier e noscia families les va a stèr fora per Fiem percheche no les troa cartier da fitèr o no les à la possibilità de comprèr cèsa e donca no demò no vadagnon forza lurier, ma perdon ence chela noscia, de noscia families fascènes. Ben segur no sarà duc i hotie che se lascia mudèr te condominies per pruma cèses o per l personal, ma na bona part scì. Sun chest argoment de gran peis podon averjer n desch de confront coi ombolc per capir coluna possibilitàdes che podessa esser. La scontrèda de la Comision Economia se à sarà su proprio con l empegn de endrezèr ocasions de debatit coi Comuns e con la Provinzia che à i strumenc adaté per dèr na man de chest vers.

Riccardo Donei
Conseier de procura al bilanz, turism,
comerz e artejanat

Na 'gift card' fascèna

Didèr l comerz de val l é un di obietives che se aon metù dant col projet 'AMajon' e per chest volon svilupèr idees e proponetes per engaissèr la jent a jir a proveder te la boteighes de Fascia. Te mia encèria de Conseier de procura al comerz, con la condivijon del Conseier de procura a l'innovazion Amedeo Valentini, é lurà fora l'idea de na 'gift card' fascèna, na chèrta de spesa che pel vegr durèda demò te Fascia.



L Comun General, ensema con l'APT e la realtèdes economiches de Fascia, porta inant scomenzadives per envièr a proveder e spener te val.

Riccardo Donei



raprejentant del CGF te l'ApT de Fascia é rejonà de chest projet col responsabol de l'area prodot Nicolò Weiss che à tout su con gaissa l'idea. L'ApT podessa crèr la card e la dèr fora, a chesta vida l'aessa n dopie vantaje: l comerziant se sentissa più recognosciù e più engaissà a fèr pèrt desche sozio de l'Azienda e l'ApT podessa aer la convenienza de na maor adejion da man di operatores economics. Endèna sion amò te na fasa de aprofondiment per capir coche l'ApT podessa gestir chesta chèrta de speisa, speron de poder jir inant e la concretisèr. Se fossane bogn de la fèr, metassane a jir na economia zircolara te val dalbon emportanta per la jent del post e per chi che vegr a lurèr, chest sistem ge dajessa segur n gran sbunf al comerz e n servije de valor per noscia firmes e sie colaboradores.

L cyberbulism: n pericol de chel che se cogn esser en consaputa

Do che de jugn del 2023 l é vegnù fora i dac de la Relazion bienèla sul bulism te la scoles de la Provinzia de Trent, l'Assessorat a la Politiches per i Joegn del Comun General de Fascia l à envia via na fona riflession e valutazion sun chest fenomen

L é vegnù fora che, enceben che duta la scoles de la provinzia, e donca ence la Scola Ladina de Fascia, les abie "passà l ejam" ajache les vèrda de ge dèr de contra al fenomen, chesta situazions les é ence te noscia realtèdes, les ciapa pe e les é n pericol che da spes no l é sorì da recognoscer e da ferèr.

Chel che se enten do e do de più l é che l front olache l é più engrà scombater no l é chel del mond reèl, olache i tousc e la toutes se scontra, i se rejona e olache sencajo i comportamenc falé i vegr feré e comedé dai gregn, ma l é chel del mond "paralel" che duc vivon con pecia consaputa e da chel che i joegn i é ciapé via zenza se n adèr di pericoi che pel entrevegnir: l Web.

I studies i desmostra colugn e cotenc caji de risech pel se sconter te chest contest, sic internet, blog e soraldut l mond di social network. N lech digital olache duc se rejona bendeche zenza niente se cognoscer, zenza saer nia de la stories e de la personnes che se scon vindò n account, olache i interlocutores scialdi più da spes e zenza rejon i doura paroles sciorfes, vèlch outa enjurioses che pel se mudèr ensinamai te azions de persecuzion e stalking. Chesta situazions se les ge sozet a personnes joenes che no les é deldut bones de rejer sia emozions e de se controlèr, te n muion de caji les pel doventèr distrutives e cajonèr dejèjes, con ejic ence trop grieves.


Per chesta rejons é considerà che sie mie dover, desche Conseier de procura enciarà de la politiches per i joegn, tor ca chest tem e fèr zeche de concret per meter a jir n'azion de sensibilizazion che se ouc dantdaldut ai

joegn de età desvalives, ma ence a la jent grana. Via per l istà e l uton del 2023 l é stat lurà fora n percors de tesç e placac che l à menà tinultima a n picol filmat de grafica animèda che l met dant slogan curc ma sorì da recordèr che vel uzèr fora n messaje fondamentèl: la paroles, enceben che les vegne dites da vindedò n vidrel, les à n peis e les pel dassen fèr mèl, donca fèsc de besegn emparèr a durèr l web con ferstont e fondament e envièr duc chi che i é te na situazion senestra ajache i é vitimes de cyberbulism a l segnalèr sobit per vegr didé.

L'azion de sensibilizazion de contra l cyberbulism la é stata slarièda fora dutentorn sul tegnir de Fascia: su la tablees publiches, te la scoles, con doi interviewes a Radio Fiemme e Radio Studio Record, sul folio La Usc di Ladins e ence online sui canai digitai e social del Comun General de Fascia. La é ence stata portèda dant al grop de lurier "Star Ben te Fascia" metù adum dai raprejentanc de la Consulta di Genitores, da la Scola Ladina de Fascia, dai assoreires a la Politiches Sozièles e per i Joegn di comuns de Fascia, dai raprejentanc de la sociazions de volontariat e de sacotenc etres sogec del teritorie.

N at de responsabilità, per ruèr a tor consaputa de na realtà che no podon schivèr ma che cognon vardèr de controlèr e de cognoscer per stravardèr chi che i é più a risech e più scherpenc, nesc joegn.

Amedeo Valentini
Conseier de procura per i Servizes linguistcs,
cultura e joegn



Sun dut l tegnir de Fascia l é stat portà inant na campagna de sensibilizazion sun chest tem grief.

Politica linguistica 2024. Anter continuità e inovazion

Ai 13 de novembre del 2023 l'Consei General del Comun General de Fascia l'à aproà con duta la stimes a una l' Pian organich di intervenc de politica linguistica e culturèla per l'an 2024, n' moment fondamentèl, no la biota letura de na relazion con tablees e numeres, ma l' cher sciantif de la idees metudes en esser per stravardèr e sostegnir nosc lengaz e noscia cultura de mendranza. Te chela ocazion é abù l' met de ge portèr dant ai membres del Consei l' lurier fat via per chest an 2023, che à abù de gran sodesfazions, e sun sie troi va inant l' pian organich de politica linguistica e culturèla per l'an 2024. Tropes l' é defat i elemenc de continuità, che se met dant de renforzèr i bogn resultac abui ti egn dant, desche per ejempie l' sostegn a l' informazion per lengaz de la mère tras programes dac fora per radio e per televijon co la programazion per ladin, ma ence n' marudel de elemenc neves col zil de slarièr fora la produzion su la piataformes web, sun sie canai digital e social e ence col lurèr fora corsc de lengaz tel format digital, da poder durèr online a na vida dinamica, ma ampò semper vordan de arsegurèr na calità auta del prodot fenì. Sostegn ence per i evenc identitères desche l' carnascèr, Sènt'Ugèna, la Festa del rengraziament e la defilèda de la Gran Festa da d'Istà, momenc che considron che i sie fondamentèi per la gran valuta de partegnuda e prestije che i ge recognosc tant al aspet culturèl, tradizionèl e linguistich. N'autra neva de gran emportanza l' é l' nef endrez che se vel ge dèr al apuntament tradizionèl de l'Aiscuda Ladina, che l' an che vegn la vegnarà metuda a jir a na vida da slarièr fora i apuntamenc fora per l'aiscuida, con chela de valorisèr più che l' é meso duta la atividades che vegnarà metù a jir per la 16ma edizion 2024; tel medemo temp chesta neva la ge dajarà l' met ai partners del event, Istitut Cultural, Scola Ladina de Fascia e Union di Ladins, de poder endrezèr miec tempes e vides per

enjignèr la atividades.

Tel an 2024 vegnarà portà dant ence la rassegna de teater che vegn fat vigni doi egn, a chela che tol pèrt la sociazions e i gropes de teater de val, projet che vegn metù a jir en continuità vedù ence l' gran bon ejit abù te la rassegna del 2022, olache n' muion de jent à tout pèrt a vigni spetacol. Ence per l' 2024 no menciàrà l' sostegn ai projec de valuta per l' lengaz e l' identità: l' é stat tout dant 14 domanes, finanzièdes per passa sessantamile euro en dut per scomenzadives de desvaliva sort, desche per ejempie la musega de mendranza, l' teater,

l' carnascèr tradizionèl, libres e tutorial, evenç culturèi e manifestazions.

Tinultima l' Comun General de Fascia ge arsegura l' sostegn ordenèr encinamai a 23 sociazions culturèles e de delet de Fascia per passa carantamile euro, acioche chisc gropes de valuta, desche museghes, cores, gropes da bal e de folklor, gropes de teater e gropes de manifestazions, i posse sentir che l' Comun General de Fascia l' ge stèsc apede e l' aprija la atividades che i fesc.

L' Pian organich de politica linguistica e culturèla per l' 2024 l' à n' valor de passa cincsentimile euro en dut, se trata ben

segur de n' pian rich dal pont de veduda economich, ma la più gran richeza l' é duta la comunanza che con chesta ressorsa la fesc n' investimenti sun se enstessa, sun sia cultura, sia tradizion e sun sie davegnir desche sozietà con sia carateristiche spezifiche.

Na suma che disc fora l' valor de la scomenzadives metudes en esser da la comunanza ma soraldut l' sentiment de partegnuda de chel che ogne sentadin de Fascia cogn esser stolz.

Amedeo Valentini



L' Conseier de procura Amedeo Valentini à prejentà l' Pian de Politica linguistica.

Chèrtes da jech “chèrta fascènes”

Per jièr a na vida originèla co la Gran Mèscres del Carnascèr fascian



L' artist Ismaele Soraperra, che à dessegnà la chèrtes, col Conseier de procura Amedeo Valentini.

Da dotrei meisc te tropa boteighe de Fascia se pel troèr n' prodot curios: la chèrta fascènes. Se trata de n' projet vegnù fora da na idea del Conseier de procura Amedeo Valentini e metù a jir dai Servijes linguistics e culturèi del Comun General de Fascia co la colaborazion del artist Ismaele Soraperra. Chest projet l' se met dant de sostegnir e slarièr fora la doura del lengaz e la cognosenza de la cultura ladina tras la chèrtes da jech, zeche che duc cognoscion e aon te cèsa. L' lurier vindedò l' projet l' é stat trop, ma segur con n' bon ejit e tropa colaborazions. La

pruma colaborazion l' é stat avisa chela col joen artist Ismaele Soraperra, che dessema con Amedeo Valentini i' à pissà de lurèr fora l' tem del Carnascèr, ajache l' é una de la manifestazions più feruscole e emportantes de la cultura populèra, de gra ence e soraldut al lurier de enresida e recuperament del Carnascèr tradizionèl, con sia mèscres e sie rituèi.

Ismaele Soraperra l' à fat n' gran lurier per meter al luster i elemenc tipics del Carnascèr e de l' èrt fascèna. Apontin i elemenc che caraterisea la Gran Mèscres – la cordeles, la facera, i bronsins e i piroi – l' é

i simboi duré per chesta chèrtes da jech, che tol l' post di colores tradizionèi, e l' Laché, l' Bufon e i Marascons tol l' post del Re, del Ciaval e del Zot.

La rapresentazion identitèra de la tradizion fascèna te chesta chèrtes la vegn viventèa amò de più tras la decorazions tipiches di pitores fascegn, che ti secoi passé i jia al Lont per sporjer sie servije de pitores coloridores, se portan do sia arpejon artistica e pitorica, carateristica de la val: la tipica “resa fascèna”, i fiores, i simboi e la formes che i depenjea su la mobilia e sui ujes de cèsa.

Te la scatola, apede la chèrtes, l' é ite ence na curta descrizion del Carnascèr fascian e la istruzions per sie jeghes tradizionèi, dut scrit te cater lengac – ladin, talian, todesch e ingleis –, che ge dèsc al projet na valuta ence dal pont de veduda turistich e kommerzièl.

Se trata ben segur de n' projet nasciù dal

Comun General de Fascia, ma che l' à tout ite bele prest duta la val: defat à tout pèrt a la scomenzadiva la Sozietà Coprativa Val de Fascia, che l' à sostegnù l' projet se tolan su l' endrez comerzièl, l' Azienda de promozion turistica de Fascia, l' Consorzio Eletrich de Poza e ence sacotanta boteighe de Fascia.

A chesta vida l' projet l' vegn slarià fora sun dut l' tegnir de Fascia, anter la jent del post e i ghesç, che i podarà portèr a cèsa n' bel don de segur originèl e gustegol, na picola testimonianza scempia ma sciantiva de noscia identità.

L' moment del jech l' é n' moment de spas e l' augure l' é chel che se goder con chesta bela Chèrtes da jech fascènes posse soscedere chi che jia de bie recor del teritorie da olache les vegn, de sia jent e de sia tradizions.

Servijes linguistics e culturèi



La “chèrta fascènes” é states aprijièdes e se pel les troèr da comprèr te la boteighe de la val.

Codejel de bona creanza per respetèr l ambient

Prejetà l 3° libret de la colana "Entener e se fèr entener"



L codejel dedicà al respet per l ambient l é stat prejetà te la sala esposizioni del Liceo artistich de la Scola Ladina de Fascia.

Idees, consees, curiositàdes e dotrei regoles per smendràr l dan che vigniu ge fesc al ambient te la vita da duc i dis.

L "Codejel de bona creanza per respetèr l ambient", scrit da Angela Pederiva co la grafica de Giuditta Soraperra, l é la una de la neva publicazions di Servijes linguistics e culturèi, la terza de la colana "Entener e se fèr entener". De chesta colana, che la vegn fora te 4 lengac (ladin, talian, ingleis e todesch), fesc jà pèrt l "Codejel de bona creanza per jir sa mont" e "L bosch e i cinc sensc", duc a la leta de chi che vel, debant.

Chest nef libret l rejona de respet del ambient: de sparagnèr èga e energies, e de smendrà la produzion de scoadies, con consees e bona prateghes da meter en doura vigni dì per ge lascèr a la neva generazions n mond manco roinà, e ence per ge passèr na vida de viver più sostegnibola. Tropa la scomenzadives metudes a jir fora per l meis de october per portèr dant l codejel e ence per moscèr co fèr per meter en pratega vèlch consei per stravardèr l ambient.

Te la bela sala mostres del liceo artistich G. Soraperra, fornida su con la operes di studenc fates co la professores Lara Steffe e Fiorella Brunel, l é stat fat la prejetazion del projet a chela che à tout pèrt ence l scritor Stefén Dell'Antonio Monech.

Laboratorie per bec: Sgòlèr co la fantasia... per no petèr demez nia

Co la sociazion Ecosisters l é stat metù a jir "Sgòlèr co la fantasia... per no petèr demez nia!", n laboratorie per bec, olache se à podù emparèr co fèr zech de utol con materièi che senò fossa ruà te bidon de la scoadies.

Sera de sensibilizazion: Moda più sostegnibola Dessema coi projec Il Marketino e Dorà second hand l é stat endrezzà "Moda più sostegnibola" na sera de sensibilizazion per rejonèr de moda, na industria che fesc n muie

Angela Pederiva

de entesseament e scoadies, e portèr dant l durèr endò da nef desche na vida de viver più sostegnibola.

Laboratorie: No l trèr demez, empèra a concèr

"No l trèr demez, empèra a concèr" picol laboratorie co la sartora Emanuela Palle olache l é stat portà dant idees e consees per concèr guanc o ge dèr na neva parbuda, durèr a na vida creativa pezes e becoi per se fèr zech de nef e originèl.

Jech per rejonèr de regoeta desferenzièda: Chèrta didatiche

Amò apede l é stat endrezzà, co la grafica de Giuditta Soraperra, la "Chèrta didatiche", n jech per se arvejinèr al argoment de la regoeta desferenzièda che deida a la fèr a na vida dreta. I bec, dessema coi genitores, i pel fèr n lurier manuèl con forfesc e cola, e emparèr ence vèlch parola neva. Se pel desciàrièr l jech su la piata internet de l'Aisciuda ladina che porta dant l projet Codejel de bona creanza per respetèr l ambient. (<https://www.aisciudaladina.it/codejel-de-bona-creanza-per-respeter-l-ambient/>)

L argoment portà dant a na vida sorida e gustegola à soscedà n gran enteres da pèrt del Consorzio Eletrich de Poza, che belimpont enstadi l à dezidù de ge donèr a duc sie sozi chest codejel, acioche la bona prateghes per sparagnèr la ressose e per stravardèr l ambient les posse vegnir slarièdes fora e toutes su da duc.

La colana "Entener e se fèr entener" ben segur la va inant, l ofize l é jà do che l laora per vegnir fora con de neva publicazions e endrezzèr evenç ence per l an che vegn. Meté vèrda e vegnine do su la piata internet aisciudaladina.it e sui social del Comun General de Fascia (Facebook e Instagram).

Angela Pederiva

PEDIES – n 2023 feruscol!



L era l 2015 e tel chèder de TV ladina, la piataforma digitèla dedichèda ai ladins de Fascia per sparagnèr fora sia identità, scomenzà via Pedies, rotocalch ladin de informazion.

L é passà ot e tropes l é stat i joegn e la joenes de Fascia che à dat sie contribut per l'informazion locala e che à didà a fèr cognoscer Pedies.

Da presciapech n an e mez la redazion del rotocalch la é mudèda, da esterna che la era, la é stata portèda daite del Comun General de Fascia; de fat ades l é l personal di Servijes linguistics e culturèi che se cruzia de portèr inant chest projet con gaissa e atenzion, ben segur col didam de la giornalista responsabola Monica Cigolla e la profesionalità de Dolomiti Media House. L obietif de Pedies l é chel de portèr dant neves e curiositàdes da Fascia e ence da la autra valèdes Ladines a na vida gustegola, feruscola e sciantiva, col uzèr fora l lengaz ladin tras l'atualità.

L é stat mudà mingol la parbuda e l tai de Pedies, apontin per ge dèr nef sbunf. Per chest, apede a servijes de atualità che vèrda l mond Ladin, l é stat scomenzà via ence dotrei rubriches gustegoles: "Zebicher: per veder più da vejin" che porta dant aprofondimènc curiose, "Svampol ciatarul: jent che fesc jerveèr sie cunst" che la conta de vo, de la jent de Fascia e de si passatempes

deribolenc e fora de anter, n'autra rubrica che sora n pech la se serà su l é "Calandèr da zacan, festes e usanzes fora per l an" che la porta dant che che fajea enlouta noscia jent aldò de chel che Simon de Giulio à scritte "Usanzes e lurgeres da zacan" e aldò di recorc de jent più o manco de età che la ne à contà sia esperienze che aon scutà su con gran gust.

Col 2023 se sera su l prum an de attività de chesta neva redazion, n an de sodesfazions: dal esser rué a 1060 encuiné al canal YouTube de Tv ladina, dal smaorament de la visualisazion, ai bie complimenti ciapé per l program, che l é chi che fesc più pijer.

La redazion la é do a lurlèr fora neva idees per l 2024, e se ence vo volede fèr cognoscer vosc passatemp che "fesc jerveèr vosc cunst", scrivene a chesta direzion: cultura@cfg.tn.it o chiamane al numer 0462 764500 opz. 4, percheche i protagonis de TV ladina e de Pedies siede vo!

Endèna seghità a ne vardèr su su Trentino TV, canal 10 de la televijion en sabeda da les 18:00, en domenia da les 13:30 e en lunesc da les 11:30 o sul canal YouTube de Tv ladina e perche pa no, meté ence n "me pièsc" a la piata Facebook de Tv Ladina, olache troède ence a un a un duc i servijes de Pedies!

Sabrina Riz



L rotocalch ladin Pedies à mudà mingol parbuda e impostazion e l vegn portà inant con gran sbunf dai Servijes linguistics: se pel l veder sul canal 10 de la televijion e sun YouTube.

Berlichete: n vender domesdì creatif te Ciasa de la Moniaria

Canche al scomenz del an l é stat pissà a l'attivitàdes del 2023, l é vegnù fora de endrezzèr, d'uton, la terza edizion de "Berlichete": n laboratorie creatif con protagonis i più picoi, metù a jir per la pruma outa del 2018, e do del 2019, en colaborazion con MarameoLab. Bensegur la doi edizions passèdes à abù n bon ejit, tropes bec da duta Fascia aea tout pèrt e i aea podù se portèr a cèsa zech da bel: la pruma outa n placat da color con dessegnes e con su la pruma paroles de bona creanza, la seconda na mapa de Fascia. Con chela, i bec, duran fantajia e materièl da rezicle, i à desmostrà sie cunst e i à desseggnà l lech che i aea più tel cher. Dapò per trei egn i bec a cajon del Covid no à podù se embater te chel buratin che à inom Berlichete.

Chest an Berlichete l é stat endò tout ca e i bec del ultim an de la scolina e de la

populèra i é stac envié a tor pèrt a la terza edizion, con argoment la condivijion, che vel dir stèr ensema, tor dant e se didèr. L tem se lea col obietif de la Politica linguistica: spenjer acioche l lengaz ladin l rue te duta la families (tant forestes che se fèsc ite, ma ence del post) e fèr acioche l vegne rejonà anter la jent, duran ence libres e materièl didatics. Donca l fil l é lengaz, inclujion, fradaa, condivijion. Cò l tem l é stat dezidù, l é stat tout contat endò con Alice e Manuela de MarameoLab e con eles dut l é jit do sia strèda. Ensema l é stat cernù l liber "L pènt di tosec", donà dal Istitut Cultural Ladin, per ge portèr dant l argoment ai bec che à tout pèrt che, do aer scutà la contia, con gaissa i à depent n belot calandèr del avent sun n tulin con 25 picoi bujes te chi che, a la fin, i à podù meter ite duc i 25 dessegnes o messajes, fac e pissé da ic endèna che l color sièa, e

doné ai etres. Donca, lèrga a cola, colores, lapijes e fantajia! I bec, endèna l avent, i podarà coscita lejer ogne di l messaje donà

dal amich e se recordèr che se didèr l é bel e emportant.

Doris Valentini



Ipicioi te Ciasa de la Moniaria per llaboratorie „Berlichete“ endrezzà ensema con MarameoLab.

Restruturazion e recalificazion del patrimonie imobiliar

Chisc dis 1 é ruà te Comun General de Fascia 1 D.I.P. (Documento di Indirizzo alla Progettazione) per la ex caserma Vittorio Veneto. Chest document é stat metù ju aldò de la cordanza che l era stat fat via per chest an col Consorzio di Comuns de la Provinzia de Trent, per poder portèr inant la fasa progetuala per chesta strutura, ajache tel CGF mencia la fegura responsabola del ofize tecnich.

L percors per vardèr de ge meter man a chesta strutura é peà via amò del 2021, tel chèder de n projet complessif de manutenzion e valorizazion del patrimonie imobiliar del Comun General, e aldò de la valutazion sui besegnes che l'attività de chesta istituzion domana. Anter l auter l é da comedèr la senta atuala del CGF, che l'à passa 30 egn, olache l é besegn de ge dèr maor lèrga ai Servijes Sozièi. L bilanz de previjon di egn 2023-2025 é stat smaorà chest an de 900.000 euro, con 700.000 euro de arvanz de aministratzion, per i intervenc de recalificazion del patrimonie imobiliar. Te chet chèder l é ence l tramudament di ofizes di Servijes linguistich te la Ciasa de la Moniaria, giusta restruturèda.

La ex caserma Vittorio Veneto

La Vittorio Veneto (p. ed. 462, C.C. Vich), l é una de la casermes austriaches fates su al scomenz del 1900 a Sèn Jan e doventèdes dapò colonies alpines de la zità de Milan, durèda desche colonia fin del 2005, e l è l'ultima amò da fèr fora. La é fata da n soul corp a pianta retangolaria iregolaria de prescipech 5.000 mc. e la cour en dut zirca 1.400 metres cadrac. L'à la medema carateristiche che aea l'autra casermes olache ades l é stat logà la



La veia caserma „Vittorio Veneto”, ultim frabicat amò da fèr fora a Sèn Jan, doventarà la neva senta del Comun General de Fascia.

senta zentrèla del Comun General de Fascia, 1 Museo Ladin, 1 Zenter sanitèr, la Cèsa de Paussa e 1 frabicat che l CGF à destinà al sozièl, olache l è 1 Laboratorie sozièl e la senta de l'ANFFAS (ex caserma Piave), che l é sobito de sot e l è stat l ultim a vegin fat fora ti egn passé.

L DIP perveit che te la veia caserma, che veginrà restruturèda con realisazion de neves volumes, podarà troèr lèrga la neva senta aministrativa del Comun General de Fascia e spazies olache posse vegin logà per n trat de temp persones che porta inant servijes emportanc per la val.

L frabicat cognarà veginà fat aldò de

criteries desche la calità bona de la finidures, n bas consum energetich, manutenzion e gestion sorides e na gestion di ambienc daite flessibola, vardan de redujer la doura de materièi no renovaboi e de durèr più che l é meso ressorses naturèlles.

L cost complessif é stimà te 4.100.000 euro, de chisc 3.000.000 per i lurieres e 1.100.000 per somes a la leta.

Ades l Consorzio di Comuns manarà fora n bando de concors per l projet te doi fases, la pruma averta a duc i profeszionis e la seconda anter i prumes 5 classifiché che cognarà aer i requisic pervedui da la lege, e se spera che chet posse vegin fat te tempes belebon curc. Chest percors é stat cernù dal

Comun General de Fascia per se slarièr fora a depiù profesionis e poder a chesta vida condivider la competenze e cognoscenze del contest per ruèr a na projetazion che posse ottimisèr la funzionalità per la destinazion ma ence ascora a la carateristiche e ai valores del raion acioche l nef frabicat posse passenèr delvers tel zenter aministrativ, sozièl, sanitèr, culturèl e religious de Sèn Jan. Tel respet del PRG del Comun de Sèn Jan la facèda cognarà esser descheche la é ades. L é pervedù che la restruturazion posse ruèr a compiment tel temp de 48 meisc.

*Carlo Ganz
Conseier de procura al patrimonie e urbanistica*



La mapa che moscia la desvaliva strutures publiches tel zenter de Sèn Jan. A man dreta la pèrt tedò de la caserma Vittorio Veneto.

Troes rencuré de gra al projet “Sa Mont”

Ence chet istà passà, de gra a l'ApT de Fascia – che se cruzia del endrez e de l'organisazion – ai Comuns de Fascia, al Comun General, a la firma de Daniele Iori da Dèlba, al grop di menacrepes de Fascia e a la Sat de Trent, l é stat portà dant l projet “Sa Mont”.

Dalajache l temp lo à conzedù, se é ponté demez belebon bonorives apontin ai 2 de mé, metan man a duc chi troes mingol più

basc che aea de besegn de na rencurada. L projet l é jit inant enschin ai 22 de setember. Per chel che revarda l investiment global del projet, l é de € 110.000,00 tolàn ite ence enciarie “extra” e l material.

En cont de chet volesse recordar che tel projet se se à cruzia di percorsc de “media montagna” apontin metan ju 80 paï e beleche 400 segnai de direzion; sa mont

enveze l é stat menù ju tablee con chela de far entener cai che fossa i comportmenc giusc da tegnir canche se va sa mont. Volesse ence portar dant che l'ApT à ence endrezà n bon strument de informazion: n boletin che met dant, te n temp se pel dir “real”, la situazion di troes olache duc pel vegin a saer cai che l é i troes che podessa esser seré e cai che enveze i é averc.

L é jà 3 egn che l é en esser l projet “Sa Mont” e posse dir che l é semper più aprijà; sarà ence ghesç che no se n à niente adat che l é stat metù dant, ma de segur, ence chisc ghesç à gust de troar troes rencuré su zenza scoadie, piante rebaltade e metui a post canche l é de besegn.

*Giorgio Dorich
Conseier de procura ai troes, trasporc e sport*



I troes d'istà i é preziousc desche i portoes da schi d'invern, ge vel che i vegne rencuré e metui a la leta de la jent con segureza e na bona comunicazion. (Fotos APT de Fascia)